

四  
書  
偶  
談

# 自序

戚子爲四書偶談成其友臨海蔣雲川書來令別爲名曰凡書以是名者如宋時鄉前輩吳荆溪有林下偶談方朔田有深雪偶談彼其所談非事則人物與夫詩賦雜文類以皆就一時所聞見爲說故曰偶耳若夫四書孔孟之言是宜莊而誦之正襟而道之爲訓爲詁爲解爲注其本注而釋之者爲疏而唐宋間則又或稱講書說書凡皆重其爲聖賢之詞不敢以褻也曾四書而亦可以偶談名

乎哉其無乃體藝而名亦不類戚子以書復曰某於四書無得也亦未嘗敢謂能說四書徒以童而習焉比長而涉獵羣書耳目所及有可左証又若意有所會不能自嘿因而遇友朋聚會商榷則談生徒及門請業則談當夫興之所至或縱己之見爲談或旁引他人之說爲談又或篇談其一章章談其一句句談其一字無倫次先後亦不取備其談而微中有合乎先儒注義不知也其竟離絕遠去類於世所謂怪談亦不知也蓋某於天下古今

事遇無不談非獨以四書爲談圍要皆以爲然而  
已是編所以名不悟其施于孔孟之言而不可也  
某請改之旣又遇吾友黃潤川曰古之人云談道  
又云談經四書所載非孔孟之道乎將不得謂之  
經乎而又何害乎談戚子躍然以喜遂稍分別其  
說之有醇有駁者爲正續內外編而仍偶談之名  
不改乾隆己酉春戚學標鶴泉自識

四書偶談內編上

學

古人論學莫先窮理。四書中學字大半是窮理。卽此節註亦在知一邊。若以必效先覺所爲句爲行。則行不宜在明善先。於先後文俱隔。以復其初句爲行。實則此句乃回應人性皆善。非與明善知行對舉也。大抵窮理爲行之本。不行則窮理何爲。此不待言。而明知行並進說書之泥也。

千乘之國

古侯國百里。以開方計之。則方百里者。萬里也。方里而井。每井八家。則萬里者。有萬井八萬家。包氏据公羊。謂軍賦十井。不過一乘。百里當千乘。伯七十里。便降爲四百九十乘。子男五十里。止二百五十乘。今以侯國稱千乘。所謂十井一乘也。馬氏則据司馬法。謂百畝爲井。井十爲通。通十爲成。成出革車一乘。則是百井出一乘。侯國百里。核之。不過得百乘。或攻包氏云。一乘當甲士三人。步卒七十。

二人牛馬甲兵備具非八十家能給此非經文不  
過司馬法之見經注者而司馬法有兩出車制在  
春秋注有甸車制凡一甸六十四井出一車則甲  
士步卒以及牛馬甲兵如或所引之數若馬氏所  
據在周禮注是成車制一成百井出一車則每車  
甲士十人步卒二十人合三十人雖成包溝洫其  
百井與甸之六十四井相等而士卒牛馬與甸大  
別至包氏公羊說則并徒役畜輦一概無有今欲  
據成車之制以難包氏而所引者乃甸車而非成

車特包說亦有可疑。古者國地不盡井，井地不盡賦。百里之國，必先去官城、都、邑、陂、池、園、囿、山川、洿、斥、廛、廬、經、術、三千六百井，又去三鄉、三遂、都、邑、邊鄙，但任役而不征稅者三千七百餘井，其任賦役者止十之三耳。以三千未盡之井而十井一乘，則三百乘尚不足，何以當千乘乎？馬氏知成車之法，與千乘不合，因謂一國千成，須得地方三百一十六里有奇，唯公侯之國乃能容之。此自立說並不引周禮公方五百里、侯四百里爲言，其直據周禮



解經獨康成有之。然總非是者。周禮所云侯國地  
與尚書王制孟子並不合也。左傳昭五年論晉  
車賦有云。十家九縣。長轂九百。長轂者兵車也。  
一縣出車百乘矣。又云其餘四十縣尚遺守四千  
乘。是十縣可出千乘。考周禮注。四甸爲縣。方二十  
里。實得二千井。一萬六千家。計之約二井十六家。  
共出一車。而牛馬甲士皆不在內。則以百里計之。  
不及十國之三。而千乘已具。然此伯國之制。恐亦  
難据。存一說以備考可也。

行有餘力二句

則字上不作一折。譬此刻不在父兄之側。此刻便是孝弟之餘。此刻便當學文之候。如是煞是教弟子身心無逸。而先行後文意亦未始不在其中。

道之以政節

春秋二百餘年。幾此者止子產一人。若德禮之化。乃大聖賢分上事。孔門除却顏子。殆亦難言。令行禁止。人少犯法。蓋亦實效如此。第不能使民真以不善爲耻。語氣一揚一抑。而字正與下節且字。

針對斷不宜并作一層說免便是無耻也如方百川文上二句都看壞

君子周而不比章

多以黨訓比細論之却有別周禮五家爲比五族爲黨比人少而黨多比爲兩相依附如鄰之親密黨則有黨首有黨羽援引固結蔓延遠而氣勢盛雖二者相因然此處比字對周說正於其狹小處見不能普徧猶未至有黨之盛也至比并與同字別比有彼此依附之迹同則幾於爾我不分矣

君陳見注

康成禮記注。君陳蓋周公之子。伯禽弟也。又詩譜  
元子伯禽封魯。次子君陳世守采地。書音義亦據  
之。

非其鬼

諸侯祭天地。大夫祭山川。庶人祭五祀。爲非禮。但  
所云皆是神。祭法人死曰鬼。左傳民不祀非族。正  
指人鬼之非祖考者。如隱七年鄭伯請釋泰山之  
祀。而祀周公。僖三十一年衛成遷都。欲祭夏相。皆

所謂非其鬼而祭康成曰人神曰鬼非其祖考而祭之是譖以求福講家反脫祖考一面而引季氏旅泰山之類由不認得鬼字

### 八佾

舞招八風故以八爲列不八不成列猶之軍卒不伍不成行佾字集韻古文作佾顯著八人之形八得爲佾六四二不得爲佾也左傳鄭賂晉侯女樂二八秦賜由余亦曰女樂二八不以四四爲文而稱二八則舞列必八可知服虔之說自勝何休

奚取於三家之堂

廟制室外爲堂。堂外爲庭。樂貴人聲。升歌在上。故曰於堂。歌時無八音之雜。奏明明可辨。故詰以奚取。

揖讓而升下而飲

七字見射義。天子與外諸侯射必三耦。耦必二人。先以上耦行揖進禮。西向揖出。次又揖。然後當階。及階升階。當物及物連作五揖。凡七揖而後升。射未嘗有三揖文也。射畢北向揖而後如升儀以降。

且又下階而揖次耦之升者更不止七揖至升飲  
司射命設豐司宮命奠觶別有小射正一官專命  
不勝者升飲名曰作飲又名飲射爵其在勝者不  
勝者一如升射之儀至升階後則勝者且避右以  
讓之使不勝者得以取觶於豐上初非勝者自揖  
不勝者升飲一耦二人左名上射右名下射升  
階時必上射先一等避左下射後一等避右此讓  
也下階亦然升下飲皆揖讓觶在堂上必升飲  
不便以下而飲爲句必如王肅七字作一句讀或

如康成注射義以揖讓而升下五字爲句而飲字又句禮節始明

夏禮吾能言之章

歷來講章及名作非爲二代慨息卽責成杞宋細玩有不然者千百年之久欲保其世承不墜固已難事而前王之大經大法流傳後世徃徃散著儒者能識之其不可磨滅者亦不全恃子孫兩吾能言之自任何等此非夫子肚造得來可知二代之禮並未嘗亡特其子孫文獻凋落故言之而人不



信足則能徵。緣上不足句爲反正總以明已言之。可信非必待杞宋文獻之足而後徵也。自文大注俱顯然可見。非別解。

### 子入太廟章

太廟尊嚴之地方當行禮。豈容少賤始仕之人。喋喋致問。若作平時往觀。如入桓廟觀歌器之類。論又太寬。顧瑞屏謂當是隔日宿齋始可。每事問既得情理。兼不碍注助祭字。孔子二十爲委吏。二十一爲乘田。委吏若周禮委人共祭祀之薪蒸木。

材。乘田若周禮之牛人羊人皆有事於廟。

### 告朔

視朔二字與告朔有分。用羊告廟謂之告朔。卽以此日聽視此朔之政。曰視朔。亦曰聽朔。同日事而有先後。又是日有朝廟之禮。大抵先告朔而後朝廟。

### 定公問君使臣章

君弱臣強。明有激而問。夫子言明國家之分。通上下之情。莫大於禮。卽晏子惟禮可以已亂之意。使

君惕然自省。下句則深儆人臣。不能事君者。夫君不修禮。使臣懷德畏威。而徒憤其強。不可使爲臣者。又不肯自謂不忠。而怨其君之無禮。此昭定哀之世。所以君臣日爲仇也。

### 社

社主用石。見唐張齊賢議。注以爲主。謂爲神所憑。非用木爲神主也。尚書亡篇。五社。東社用柏。西社用栗。南社用梓。北社用槐。大社用松。周人亦不專以栗。

管氏有三歸節

三歸先儒都主一娶三姓之說。大夫惟得置宰一人。仲時臣立三宰。便是不攝之証。此節不但不許混入僭字界。并要使或人可強解到知禮去立言須處處照顧。勿一味貶抑。

子語魯大師章

始作。只有人聲與鐘磬琴瑟耳。不得便云八音。翕如者。斂而未舒之意。對從之二字看。非衆音俱合之謂。從之是笙入時亦但可云八音克諧。人聲與

凡音如一清濁高下四字。到繳如內方可用下句。則清濁高下相生如貫珠也。樂有小成大成小成者一律爲宮。叶以所生之五聲。起調畢曲而已。始奏一調爲宮。更奏十一管。還相爲宮。各叶以所生之五聲。而仍以爲宮之本律起調畢曲。乃樂之大成也。大成必歷九變。非大祭祀不用。

### 封人

按封人掌設王之社壇。爲畿封而樹之。凡封國設其社稷之壇。封其四疆。造都邑之封域亦如之。雖

有封疆之責與專任守土者不同若啓閉迎候之職尤不相涉不考周官多錯解注

從者見之

此句面是從者前後語脉却以封人爲主只作入見兩字看始接得下文出字

放於利而行

放之訓依猶亂之訓治古人多以相反者見義

佞

佞是口才有二種一種是務說人一種是務勝人

此章重禦人無取媚意

乘桴浮於海

雖是設言。畢竟聖言近理。海非可以桴浮。况桴又筏之小者。意謂乘桴循小港而出至海口也。

臧文仲居蔡章

古注皆譏其僭竊。朱注則專主諂瀆。二意須兼之。家不寶龜。記文也。山節藻梲。爲天子廟飾。亦記文也。仲以諂瀆之故。至不恤越禮犯分。其昧人鬼之理。閭上下之辨。爲已甚矣。古注皆云刻節形如

山與朱注微異。占人凡卜筮。君占體。大夫占色。知大夫得就官占。或有有司主其事。如冠禮所云。筮人者。若居蔡則自以爲寶而藏之也。又按白虎通。天子之龜尺二寸。諸侯一尺。大夫八寸。禮器家不寶龜。鄭注爲貨貝。不作卜龜。則是大夫原得有龜。但必崇侈宮室以奉之。則惑矣。此亦可參一解。史記褚先生說。高廟有龜室。以櫝置西北隅。懸之櫝。卽龜室也。

陳文子有馬十乘



十乘是世守采邑所出。每甸出車一乘。十乘十甸之地。蓋采邑之大。非專論馬匹也。凡地以開方計之。方十里者爲方一里者百。其賦十乘。方百里者爲方一里者萬。其賦千乘。

### 甯武子

注武子仕衛。當文公成公之時。成公元年。莊子猶在。三年。武子始盟宛濮。世族大夫父死。子繼。故後人有武子未仕文公之疑。然鄢陵之戰。樂書韓厥父子俱在軍。季武子已立悼子。而長庶公彌爲公。

左宰安見武子必不在文公朝仕至聘魯乃成公  
反國後事輒以不拜彤弓湛露作知字實証此則  
全昧先後武子非先知後愚截然兩樣蓋心則  
爲君而其舉動詞色間別有一番隱忍沉晦氣象  
不使人疑慮如易所云內文明而外柔順者緣到  
此不得不愚愚卽其知之妙用若鍼莊子士榮亦  
忠於君而以悻悻爭勝取忌晉人只坐不能愚耳  
此與汪知巧之士所深避不爲實作愚忠看者若  
稍異然保身濟君云云固隱含此意也

願車馬節

車馬輕裘物也。與其公心也。做之而憾。是係累於物而失其公物之本心。故願無爲子路求仁之事。如云樂與賢者共做。是。有。心。慊。慨。也。成。毀。有。數。做。之。友。猶。做。之。我。尤。涉。曠。達。一。路。矣。

居敬而行簡

敬卽敬事之敬。居卽居之無倦之居。所云居敬者。無衆寡無小大。一以無敢慢之心處之。又如武王之戰。兢惕厲不泄。邇不忘遠。蓋正要於不求簡處。

做出簡來方與下一味慕清淨而安苟且者反對  
真切若持心持身之敬與此處無涉

乘庾九百

聘禮諸侯之使皆以粟十車列館門外禮注每車  
有一乘五庾計十車共十五乘冉有以三分之一  
與赤母此亦準聘禮而行古注九百九百斗按  
九百斗爲九十斛五乘合爲八十斛是多於五乘  
十斛也又聘禮十六斗曰簋十簋曰乘庾卽簋之  
別名

乘肥馬

古注乘駕肥馬明非騎坐也。三代無乘馬者。如有馬借乘。亦是借以駕車。古公走馬。此急難從權。然左傳左師展將以昭公乘馬而歸。已有騎之漸。

子游爲武城宰

行不由徑。循正道不苟。一句已盡滅明爲人。下則又以見其人可近不可狎。但中心好之。不敢言得也。對夫子問意。

奔而殿

司馬法前車啟乘車大震。倅車屬焉。大震卽大殿。  
襄二十二年齊侯伐衛。大殿商子游御。夏之御寇  
崔如爲右。燭庸之越駟乘。自衛將遂伐晉。是殿定  
於出軍之先。且非一人。魯無軍政。先時不命殿。故  
定八年師退陽州。冉猛先。其兄僞呼猛殿。清之役。  
右師奔。孟之側後入。以爲殿。蓋非定有爲殿之責。  
而能出死力。以全一軍。若本命爲殿。則職分所宜。  
何足言功。策其馬者。策其駕轅之馬。使車速進。  
也。古未嘗有騎戰。

人之生也直章

兩生字皆生存之生一正一反。語氣緊對程注生理本直是原所以然爲先。一層道理誤認作上句正解遂將兩生字一作生初一作生全致上下語氣寬隔界縫中仍須斡補順理生全意此爲不善讀注。

泰伯章

泰伯而立則後之有天下者安得爲季之子孫天下二字從後言之當日只是讓國至云讓商無論

太王忠貞斷不萌代商之心。其時商正全盛。而太王方避寇之。不暇勢亦不得生此心。且伯苟讓商。則當逆太王傳位。季歷之志自安。世及之常。今乃先去以使之必傳。是助之奪也。讓云乎哉。魯頌實始剪商。爾雅釋詁云剪勤也。則剪商卽書其勤。王家之意。就作剪滅解。亦不過謂後世伐商基此。豈太王預有此志。左傳泰伯不從四字。上承太伯虞仲。太王之昭。下接是以不嗣。乃謂伯不從昭穆之次。繼立委國而去。非謂不從剪商也。左傳史記皆



云太王欲傳位季歷。是久有立少之心。豈因伯不從剪商。然後改圖。注意前後俱讓商。中間是讓周。從中間可也。此章止有父子兄弟之情。不及君臣。太王欲傳季及孫。不過云代有殊德。舉世將享其福。此卽爲天下公心。非有他志。然令伯不去。太王必不廢長幼之序。且公然而讓季。亦將效叔齊之節。此泰伯之去。所爲曲致父子兄弟之情也。如以君臣立論。誰非商臣。而以蔑義之事委之弟乎。且又何以爲傳之者地乎。

達巷黨人節

注美字重惜字只帶過方與下聞人譽已承之以謙注一串

畏匡

史記謂匡是衛地莊子謂畏匡在宋或又誤作陳此見左傳明鄭地也定六年公侵鄭取匡陽虎假道於衛而穿城過之時虎帥師故得暴匡後夫子過匡顏刻爲僕以策指之曰昔吾人此由彼缺也故匡人疑而圍之顏刻卽顏克曾爲虎僕彼缺城

缺也。琴操作穿垣虎入匡由此耳。

譬如爲山章

上一段爲用力者戒。下一段爲不用力者勸。義本兩平。注自強不息則積少成多是訓下段中道而止。則前功盡棄是訓上段。取文氣之便順。將下段意說在前。上段意說在後。未嘗有意融并一層也。時文不審注意一味混攪。如云學祇當進不當退。自可云不進而前功盡棄。則但有上段無下段矣。白文明有兩譬。如時文提爲山作主。竟是一直貫。

下者謬之至矣。

### 縵袍

縵袍以縵爲袍也。喪大記衣有三名。一單衣。名禪衣。一夾衣。名褶衣。一絮衣。名複衣。複卽袍也。袍必有絮。實其中。古無木綿。只取繭繡與縠。縠之亂者。搏而爲絮。以縵爲絮。卽謂之繭袍。以縠爲絮。卽謂之縵袍。縵者亂麻之名。荆通傳束縵請火是也。故玉藻三衣。以縵繭與縵。總屬一袍。與下文禪褶合而爲一。其曰縵而爲袍者。合上縵繭言之。非止

曰。經是袍也。若卽衣中之絮。楊子法言有紵絮三千語。卽絮衣也。字又通褚。漢文遺南粵有上褚五十衣。中褚三十衣。下褚二十衣。以絮衣厚薄爲差等也。經袍乃以絮爲著。而納之袍中。無繭續之溫蓋已爲貧賤者之服。况又敝乎。

### 歲寒

謂此歲之寒。異於常歲。若四時之冬。自宜寒。於世亂意不開照。

### 上如揖

今人之揖。卽古之肅拜。古之揖爲推手。有高平下之分。上如揖。與天揖。推手小舉相似。揖所與立。亦是推手而傳詞。鄉飲酒禮。賓厭介入門左。介厭衆賓入。注。推手曰揖。引手曰厭。推手。手向前。厭手。手向身也。

### 享禮

勿與燕享之。享。混視。蓋享食之禮。以禮賓。因亦有幣以將之。故概稱享。乃主君之事。與使臣之獻物者絕不同。

緇衣羔裘三句

皆是禮服。但不必分貼朝聘祭。以黃衣爲蜡服。尤非經世驪珠。辨之詳矣。衣以裼裘。眼目在裘不在衣。裼襲只一衣袒而不盡露其裘曰裼。全覆而不使裘外見曰襲。襲藏也。非重也。

短右袂

袂非袖。今之袖乃古之所謂袂也。玉藻袂可以回肘。注二尺二寸之節。人肘長尺二寸。袂上下廣二尺二寸。故可以回肘。又曰袂尺二寸。注袂口也。詩

豹裘傳。裘猶袂。袂不得爲袖明矣。

吉月節

凡言朝服。唯是元冠緇布衣。素積裳。孔注於此。獨以皮弁服解之。士冠禮云。皮弁素積。國君視朔之服。大夫亦服者。禮云。三王共皮弁素積。周則天子與士同用之。孔意魯君雖不視朔。夫子必服此者。與簞牟存禮同意。但玉藻孔子云。朝服而朝。卒朔然後服之。是未朝時宜用皮弁素積視朔服。卒朔後仍用元端素裳朝服。魯廢視朔禮。未必盡廢朝。



也。

齊必變食

不但是潔其口兼欲充其氣。玉藻朔食加於日食一等。周禮王齋日三舉殺牲謂之舉。安得有。不食肉之說。不如葷者。葷字從草。指五辛而言也。禮中亦言飲不致醉。不全廢酒。

膾

膾是生肉。先大鱗切之。再橫切之。勝之以葱薤。柔之以醯醢。詳少儀。內則䟽。其爲漬肉。則但薄切。

之以湛諸美酒期朝而食也。其爲糝肉則但小切之而合以稻米爲餌而食也。膾不湛酒不煎故非細不可。

### 祭於公二句

曲禮凡祭於公者必自徹其俎。䟽此謂士助祭若大夫以上則君使人歸之。按徹俎歸俎不同。當祭未徹俎時尸與主人主婦俎有司徹之。臣得獻之俎自徹之。置於堂下。及祭畢士自持歸。大夫以上君使人歸之。然則此不宿之肉卽君使歸之俎而

郊。膳。不。致。亦。指。不。歸。俎。言。也。時。說。直。謂。君。所。頒。祭。肉。不。知。臣。助。君。祭。自。有。所。獻。之。俎。肉。卽。所。云。賓。俎。也。

### 侍食節

禮。若。賜。食。以。客。禮。待。臣。則。無。膳。宰。在。旁。故。先。自。祭。後。命。臣。以。祭。祭。訖。品。嘗。食。所。謂。後。祭。先。飯。也。子。之。異。在。不。待。君。命。之。祭。輒。自。同。膳。宰。避。客。禮。云。引。玉。藻。爲。鮮。尤。明。正。嘗。食。膳。宰。取。君。前。食。嘗。之。此。臣。侍。君。乃。臣。自。嘗。已。前。食。非。正。嘗。食。故。曰。若。也。

朝服立於阼階

阼階者廟之東階也。大夫三廟在居室東。古人祭五祀亦於廟中。孔安國注此及郊特牲鄉人禘疏皆明指廟中。皇侃疏云朝服者元冠緇布衣素積裳。卿大夫之祭服也。是朝服卽祭服。故用以依神。升車節。

自車後而升也。御居中。乘者居左。凡古人之乘皆立。惟婦人乘安車始坐。

宗廟之事如會同

近有言朝覲皆於廟行禮會同卽從宗廟中抽言謂得如字之解。不知朝覲宗遇之禮行於廟朝至會同則行於國外。凡時見殷見皆王爲壇合諸侯而命事與政卽諸侯相見於隙地亦與宗廟無涉。平還爲正。

銓爾舍瑟而作

六字爲一句。

異乎三子者之撰

是謙詞。

足兵

先輩謂兵卽周禮五兵。左傳誰能去兵之兵。凡經傳言兵俱指所執其以卒爲兵。則秦漢後語。易君子以除戎器。戒不虞。是武脩當豫者。若三代之卒。卽民爲之。有事則召。諸甸無事則歸之農。不煩言足也。但簡稽訓練意亦須補。

去兵去食

古法寓兵於農。兵不在農外。如何去法。蓋去兵卽是去兵政。如族師起徒。遂人較役。甸卽治車輦牛。

馬凡會司徒而致司馬者且姑緩之但囚民以守若去食則并荒政之薄征者亦去之是去而不征非征之而又去也

何哉爾所謂達者

爾所謂達先抑不得以下有是聞非達一折也達自有所謂達先墊不得以下有夫達也者一提也時墨用揄揚隆名字貼達是已於夫子口中先認聞作達矣何待子張說耶

不能專對

擊出使之有介。方醒得專字。文十八年秋公子遂  
叔孫得臣如齊。此介之書於經者。昭元年伍舉爲  
介。此介之見於傳者。一說專擅也。公羊傳聘禮  
大夫受命不受辭。出竟有可以安社稷利國家者  
則專之可也。大全辨通義理。識時務不拘君命不  
執成規。正得其解。錄以脩參。

卅子退朝章

人只知重其事也云云。不知主腦在何處。句。古人  
臣辨色始入。旣朝而退。不過日中。詩大夫風退無



使若勞。又云自公退食。可知出入皆有常節。而議政亦只在此前後數刻。私朝當不異是何晏一問。怪其過時。非禮初不疑其所議。非政及求以有政對。乃警以此。特大夫私事。若朝廷議政。有時不應我不之聞。仍是責求之晏。又以明公事不當私議也。時解忘却來由。專以政事二字爲上下名實之辨。然則政逮於大夫。夫子先不宜說政矣。政事古人通言。斷獄在其字。据春秋傳。卿大夫亦有內外朝。外朝稱公朝。與私臣議公家之政事。故曰

業官職內朝稱私朝與私臣議私家之政事故曰  
庀家政季氏自有朝自可與家臣議政議事若必  
議在國朝則陪臣無入朝議事之禮故此非夫子  
所責責者議之久也朝見曰朝夕見曰夕周禮大  
宗伯註朝猶朝也欲其朝之早也若晏退非其常  
國語范文子暮退於朝武子曰何暮也與子問正  
同

葉公問政章

葉縣在今南陽府有方城山楚國方城以爲城卽

此越王無疆曰夏路以左謂楚通諸夏路出此人  
向北行以西爲左也。楚嘗連山累石於此號曰長  
城蓋國第一重地與諸夏相接處宜以諸梁鎮撫  
而近悅遠來之告亦因人因地而發也。

君子而不仁者章

此爲小人有托於仁者因極言仁之難君子未盡  
若輩如何假冒得來謝註專論君子不及小人一  
面至講家反重上句及二句平重語脉全散矣王  
弼曰假君子以甚小人之詞何等直截

行人子羽

鄭有兩子羽。一子羽乃穆公之子。爲人所殺。後爲羽氏官馬師。一子羽係公孫非公子。不在七穆之列。杜預世族譜以公孫揮入雜人內。又衛亦有行人子羽。

駢邑三百

三百三百家也。易其邑人三百戶。本義邑之小者。惟本非大邑故。一旦奪之。遂至窮困。若荀子所云。書社三百。以一社二十五家計之。當得七千五百。

家伯氏非齊強家。未必有此大邑。且莫之敢拒。是力無可如何。非心服之云也。

臧武仲以防章

要君之名。仲所不居。必曰是要季氏。求後仲又不甘。認求季氏曰。吾是求魯。特下於魯二字。與以防對。隱若敵國矣。

桓公九合諸侯章

疏引史記兵車之會三。乘車之會六。穀梁衣裳之會十有一。鄭不取北杏及陽穀以爲九。湯武伐

暴用兵車。未始非仁。向戌弭兵。不用兵車。當時無言其仁。仲之仁在能糾合諸侯。不以兵車。非以不用兵爲仁也。天下有道。則諸侯合。無道。則諸侯離。離必爭。而天下受其害。桓欲匡天下。莫先合諸侯。大約始亦藉威力。至久而天下信之。則與國服。五禁行。尊周攘楚。大義曉然。列侯各以玉帛相見。而兵車不用矣。九合者。一匡之事。不以兵車者。一匡之成。而莫非仲力。所以爲功在天下。澤及後世。經文以不以兵車。屬之九合諸侯之下。明是紀其

成功如此者。既與經傳所載不致窒碍。并注中不假威力四字。亦融貫。不以是相與諸侯。皆不以天下自此得休息。不單主會盟說。方見管仲之仁。

### 仲叔圉治賓客

治字有一番實際。古者賓至。先導迎郊勞。入國則有授館。視塗致餐。陳芻等禮。以至入廟行禮。既聘禮賓。及賄贈餞送。儀節甚多。或貴國賓至。則以班加等。若天子之使。皆官正蒞事。上卿監之。又有兩國使臣同時至者。則或班以其國。或禮視其秩。非

熟於典故者不能無失。時講輒以言語應對了之。則是對賓客非治賓客。又如祝亦宗廟中一事。單說以言事神。安能盡治字。

遽伯玉

左傳襄十四年。孫寧逐君。不對而行。伯玉已爲大夫。且爲逆臣所憚。必在強仕之年。乃後此九年孔子始生。又六十餘年。當定公十四年。夫子始主伯玉家計。伯玉已百餘歲矣。

石門



太平寰宇記古魯城七門次第二門曰石門卽子  
路宿處。論語注謂魯城外門是也。又今曲阜東北  
三十里有石門。卽杜甫訪張隱居詩所云石門斜  
日到林邱也。孔子魯人。故下但舉氏便知非齊鄭  
會處之石門也。

### 乘殷之輅

商以木輅爲大輅。此自崇質之意。至等威之辨。則  
非一樸素渾堅之木。便可以別隆殺。蓋商自有大  
輅。先輅。次輅。三項等威必合。諸輅辨之。禮器所云

大輅繁纓一就。次輅七就。郊特牲所云。大輅一就。先輅三就。次輅五就。此正商輅等殺之準。周以就數多。爲大輅。商以就數小。爲大輅。其餘臂茀軒綏。亦俱常有辨也。大抵大路越席。原貴質素。商以木輅爲大輅。不尚繁縟。所以可法。齊志。殷因乘鈞。而制車。因桑根而爲也。

### 臧文仲竊位

道是責脩賢者。非也。考左傳。僖十六年。季友卒。至文十年。計二十七年。並文仲執政。仲死。然後襄仲

執政且子宣叔孫武仲並爲司寇則司寇是其世職而惠爲士師乃其屬國所日接者既困之下僚復不容直道蔽賢病國當首誅盜魁尚何責徐賢者之有論語注魯大夫食邑柳下云食邑此本左傳孔疏孟子注中柳下惠居柳下此見莊子注意因食邑柳下遂居之兩註固可通也

### 東蒙主

注無主大皞祀意時文因顓臾大皞之後而杜預注左有故主其祀之語致主字徃徃夾雜不清不

知主大皞。任宿須句。所同主東蒙。顯史所獨。二意可兼。在識客主。禹貢蔡蒙旅平。西蒙也。蒙羽其蔡。東蒙也。在魯東。故曰東蒙。

是社稷之臣也

義疏鄭注詩云。諸侯不臣附庸。而此云社稷臣者。是時已臣屬魯故也。

虎兕出於柙二句

只設言以明典守者失職。無所委咎。虎兕不可貼季氏。龜玉不可貼王章。認真說出。說毀則無可。

救止矣。非夫子責望非求意。

夫如是故遠人二句

夫如是三字緊承上節作一頓言惟國家無貧寡與傾必由於能均安和如是故遠人不服但修文德不必勤兵於遠。

有馬千駟

向謂千駟當卽賦乘計筭近得一解云此乃公馬之畜于官者非國馬散在民間者也周禮校人掌馬政天子十二閑良馬十閑二千一百六十匹駑

馬二閑。千二百九十六匹。共三千四百五十六匹。  
降而諸侯六閑。猶千二百九十六匹。皆所以給公。  
用。脩賜予也。齊景時地大於王圻盛時。又唯狗馬  
是好。故畜多如是。若出自民間。則說苑所稱我長  
轂三千乘。更不止是數。衛文有駟牝三千。秦后子  
私車千乘。更有無祿而益馬者。則知古人以多馬  
論富。非偶然也。

餓於首陽之下

此對齊景千駟言。只是一窮字。白文無餓死字。不

食周粟尤非章意

子之武城章

道字寬須照註提出禮樂方見弦歌來歷子游實在教化處注用字三見通章眼目

聞弦歌之聲

器而被之以音音而叶之以器氣不靜則手不調志不和則音不雅其人具有平日陶冶工夫須先看好弦歌與道字方有關會但說泚泚好音何異於十棒元宵鼓耶此句止就聞字收住推原宰化

預加贊嘆。便佔下節。

學道二句

須見得有教之者。不可說君子小人自學道。夫子平日亦是論治。非論學也。君子將來有位者。註以位言。勿誤認。

偃之言是也

偃之言對下。前言是也。對下。戲之耳也。字死中有活。

東周



息國師曰。周八百年。東西周之名。凡三變。初言東  
西周。以鎬洛對。言鎬爲西也。此後言東西周。以王  
城成周對。言王城爲西也。戰國後言東西周。以河  
南鞏對。言河南爲西也。按周公營洛在下都。卽成  
周也。平王遷王城。去成周四十里。及子朝之亂。敬  
王始遷成周。成周漢爲河南郡所治。雒陽縣。王城  
漢爲河南縣。

子謂伯魚章

註修身齊家四字不平。二南之詩。但言治國由齊。

家耳。若其本在修身。必待爲之者。自得於聲詩之外。然後有所興起。爲能推之而通。放之而準。不然。何處向二南中覓修身語。

微子去之

只是行。邈非適周。

是以君子惡居下流二句

水亦有言惡者。左傳有汾澮以流其惡。昌黎池記。虛以鍾其美。盈以出其惡。是也。宜夾寫。

周有大賚二句

註引大賚於四海。又特下此言。所富皆善人。句見與書意指賚百姓者不同。又謂詩序賚以錫予善人。本此。則朱子明以善人指功臣。而大賚之爲大封可知。蓋善人指功臣。乃與上節言帝臣相對。而亦與下仁人一片至施恩百姓。只消一二語圓足耳。

### 康誥

括地志。故康城在許州陽翟。今禹州。正孔安國所云康圻內國名。叔之初封也。康成作謚解。則康叔

子稱康伯爲父子同謚矣。

畜馬乘

何以見士初試爲大夫。按書傳。士飾車駢馬。駢馬。二馬也。詩四牡駢駢。孔注謂大夫以上。乃得乘四牡。然則乘字當作四字。解而畜者。猶言脩也。渾說。良馬在閑。何以別其爲大夫士耶。

君子而時中

對下無忌憚。看隨時處中。不作自然。

莽月

論語注謂周一歲之月。此云匝一月。大抵期者。復時之名。周歲曰期。書期三百有六旬有六日。是也。周曰亦曰期。左傳叔孫旦而立期焉。謂自旦至旦。既已復時。亦謂之期。然則自朔至朔。周月亦得謂期也。

### 宗廟饗之

祭法有虞氏禘黃帝而郊嚳。祖顓頊而宗堯。國語有虞氏禘黃帝而郊堯。祖顓頊而宗舜。皆不及瞽瞍。燕氏遂謂舜爲堯後。不自立廟。無論祭法國語。

二說參差難信。卽如其言黃帝顓頊。明有禘祖。二祭安得謂舜不立祖廟。尚書祖考來格。虞賓在位。祖卽黃帝以下。考卽瞽瞍。賓卽丹朱。又孔安國注神宗。據帝系謂舜之七廟。黃帝爲始祖。顓頊窮蟬爲二祧。敬康勾萌。螭牛。瞽瞍爲四親。皆理之可信者。若舜於堯。當別有祀也。馬融解書。憂擊鳴球。亦云舜除瞽瞍之喪。祭宗廟之樂。神宗之宗。廟號也。宗祖之宗也。宗堯之宗。宗祀也。明堂祀帝之別名也。宗祖爲七世之祖。當立主立廟。宗祀爲五帝

之祀設主而不立廟此其別也

無憂者一節

講家事以遇言一似文王大事現成者則注何以云此文王之事且何以見文王之盡道哉不知自王季視之文王述也自武王視之文王亦作也文王一身宜盡者正多但聖父聖子相接前省一番更創後省一番顧慮諸事從容做去不致有日不暇給之勢絕不見其爲焦勞拮据者此所謂無憂也以安分無爲爲盡道合講謬說耳

夫孝者五節

注下文又以其所制祭祀之禮通於上下者言之而踐其位節。注云其指先王似單指天子。非下所得通。蓋上是祖考。下是子孫。臣庶祭祀之禮由上治以下治。旁治此卽所謂通於上下。非上下通行之謂也。人多悞會。

陳其宗器

周禮天府掌宗廟之守藏。大寶器藏焉。祭則陳之。又典庸器掌藏勳器。及祭祀帥屬陳之。鄭注庸器



伐國所獲之器。及以兵物所鑄銘也。是祭時陳器。有此二項。不止天府一條。庸功也。凱旋告廟。歸功先世。此亦得爲宗器。大訓河圖。不是簡冊。當是范刻之於器者。

### 設其裳衣

守祧掌藏先公之遺衣服。祭則設以授尸。立尸象生。故以所遺衣服服之。必是禮服。其非禮服尸所不服者。未必藏之。守祧卽藏亦未必設也。時文隨手引用。似凡遺衣服無不設。將尸能遍服之乎。抑

授尸外另陳之乎。周法有男尸無女尸。則后妃之遺衣服不設。可知葛覃浣濯如何妄引。先輩論遺衣服有二項。一則授尸。一則設座上。以爲魂衣。緣天子歛衣百二十稱。至大歛所遺。則司服授守祔藏之。及祭以上衣授尸。士禮所云尸服卒者之上服是也。其非上衣與尸所不服。但陳於座以祭之。統謂之裳。蓋將上服解作上下之上。因謂衣授尸而裳不授尸。然不如解上服爲上等之服。則上服卽禮服用以授尸。而餘服不授。其義尤愜。又彼

所據是初喪禮。乃周禮司服所謂大喪供奠服。此時喪奠無尸。故陳座以祭。至後來之祭。則尸所不服。其設與不設。俱未有所明文也。

### 薦其時食

兼草木之滋。禽獸之滋。言鬼神貴氣。臭不貴。褻味。祭祀不言煎和膳膏香一條。乃王之膳膳。非祭祀正典。時祭不脩物。凡鼎俎銅莖。各有限制。四時不異。惟籩豆。庶羞爲籩人。醢人所掌。則每及他物。如臠臠。胖腊。麇蕡菱芡類。各以時物實之。所謂時

饗是也。月令一歲中八薦新。與此不同。此是正祭。彼是隨時而薦。此所薦非一物。彼專爲一物。

序爵句

同姓豈獨無爵。旣不容列之西階。失親親之情。又不得雜處東階。昧貴貴之義。任荆溪援墓人職葬。必以昭穆有爵者居前之例。於序昭穆中另俾有爵居前一行。與異姓對似近理。

序事句

張江文於禮制未盡。事雖不外爵爲序。然其間職

事必有平日一定與臨事分派不同如太宰大宗  
伯以至閭人鬱人之屬此職事一定者其助祭侯  
伯及澤宮校射之士初無一定職事須臨事派撥  
舊職申戒新職量子皆所謂序皆所謂辨也張文  
徒据周官現職爲言未考論及此至中分大小賢  
大賢專指助祭諸侯而不及王朝卿士小賢第舉  
王朝之士而不及侯國貢士尤爲疎也 事有在  
祭前一日者有在本日者有在第二日者序之不  
必定一人一事有一人兼數事如太宰贊玉幣兼

玉几玉爵是也。有數人襄一事。如大宗伯涖鬯。小宰則贊裸是也。太史大祭祀戒及宿之日。與羣執事讀禮而協事。祭之日執書以次位常。辨事者考焉。此卽序之之人。有有事而不入廟者。有在廟而未有事者。陰統於陽。從后有事。一層補在後。方不碍通篇議論。

旅酬

注引賓弟子兄弟之子。各舉觶於其長。而衆相酬。據儀禮係無筭爵事。然旅酬二字已該得無算爵。

不必以儀禮節目先後疑

### 燕毛

任翼聖据世子記及行葦疏謂同姓爲燕亦必立異姓一人爲賓以行禮又引湛露鄭箋異姓至讓而止同姓則成之文後自跋甚悉

### 踐其位節

諸其字注本渾指先王講家必謂指文王且謂太王王季在所尊內則文王不在所尊內矣豈武王時文王猶未入七廟乎况周公制禮時卽武王已

死入廟在所尊內何論文王此等妄說不知從何而起上章於武王言纘太王王季文王之緒於周公言成文武之德俱無劃開文王另說理以死者爲心卽是孝祖父一視何但舉父爲言乎

好學近乎知

多說好學則見聞日廣道理日明此仍是求入道何嘗是求入德知者性之德虛靈不昧者也好學則私念不雜而虛天機日啟而靈漸復不昧之體至於見聞日廣並足內証心性意自可兼然要說



得入德與入道有別。好學實際在下。文擇善及博學之二節。近知勿涉。雖愚必明。

### 送往迎來

章句以符節屬送往。委積屬迎來。考遠人往來。凡送迎俱有符節。委積夏官懷方氏掌來遠方之民。而達節以送迎之。故蕃國諸侯每告至。皆遣人往迎。去則送之。若商賈行旅。則守關有內外之送令。內者從外入。外者從內出也。但節各不同。門關用符節。貨賄用璽節。行旅用旌節。此只蕃國商賈行

旅不及賓客。不得引秋官環人送迎賓客爲証。蓋  
賓客義具朝聘句也。若委積亦有往來禮。禮註從  
來至去皆設之於道是也。故懷方氏掌委積謂續  
食往來地官遺人三十里有宿。宿有委。五十里有  
市。市有積。皆以給來往之用。第賓客與商旅不同。  
如稍人以稍聚待賓客。則專是賓客以旬聚待羈  
旅。則專是商賈行旅。故掌客委積有牢米薪芻。此  
賓客之禮。與遠人無涉。

繼絕世舉廢國

繼絕如武王使仲雍孫周章繼太伯後而別封周章之弟仲於虞以奉仲雍之祀成王誅武庚又封微子於宋使繼殷祀是也舉廢如箕子封箕至周國廢而封之朝鮮蔡叔以叛國除其子胡改行復封之是也

### 星辰

日。月。之。會。爲。辰。指。天。之。十。二。次。言。爲。辰。之。正。義。北。辰。乃。旁。義。若。東。南。隅。之。辰。卽。統。在。十。二。次。中。而。水。星。之。爲。辰。星。大。火。之。爲。大。辰。仍。是。星。至。日。月。星。之。

統稱三辰。益當別論耳。

### 華嶽

四書脞言。華嶽二山。與河海對。按周官職方九鎮。河南豫州。其山鎮曰華山。正西雍州。其山鎮曰嶽山。爾雅五山。河南華。河西嶽。

### 不考文

註。文書名。二字本周禮外史。卽字也。

### 車同軌

車之同。不用驗之車。但覩轍迹之廣狹。如一便知。

車之制度無殊時下渾填考工只是車同制耳

### 小德川流二句

本舉氣化喻聖人時文轉以聖德形氣化反主作客濫觴趙明遠而愚者多效之翻謂能閔照仲尼

### 淵淵其淵二句

前言小德從旁人觀聖人形容想像故曰如此言大德直從聖人分上說故曰其如淵其淵總是一淵如天其天總是一天註非特如之而已莫呆謔

四書偶談內編下

太平戚學標翰芳著

孟子見梁惠王章

開口言利。便見平日趨向所在。登高而呼。何怪羣下百諾。故須先斬其舌。章內凡八曰字。宜着眼。

顧鴻雁麋鹿

顧字對百姓。看不對孟子。看就章意論之。意不在民義爲重也。麋陰獸。冬至角解。鹿陽獸。夏至角解。麋澤獸。形大而角枝向後。鹿山獸。形小而角枝

向前爾雅麋之屬有麋麋麋狄四名而非鹿鹿之類有麋麋麋麋四名而非麋說文大曰麋小曰鹿原文無此六字後人增入

### 靈臺

閣謂之臺郭景純曰積土四方凡經言臺門臺榭其上有木者也單言臺其上無木者也括地志言靈臺孤立高二丈周回一百二十步是唐太宗時猶存

### 五畝之宅

二畝半在田。二畝半在邑。此括趙註爲言。說者因趙註有各入保城之語。遂指國邑言。按邑里也。漢志云在邑曰里。此在國與鄉俱有。若國邑則百里之國。約有萬井。其所爲城。不過五五二十五里。然且宮城廟市。去三之一。乃欲使萬井八萬家之邑里。並入其內。能容之乎。況國賴封守。外無敵至。而盡棄縣稍都鄙於不問。專守國城。無是理也。管子內政。四民勿雜處。田野之民。不入國都。韋昭謂周制城郭之域。士工商而已。農不與焉。此所謂邑。但



如公邑家邑邱邑都邑類凡井之隸於鄉州閭黨者自有邑非國邑也入保之說斷乎無之或引詩上入執宮功并春秋戰郎禹人入保之保爲証皆義所難安

### 齊桓晉文之事

意問取威定伯之事桓文事迹固其所熟知也就桓文說當言其威服諸侯天下莫強此卽大欲所在尊周攘夷宣王所羨慕不在此

### 文王之囿

豐在岐山東南三百餘里。文王在位四十九年。乙丑始徙都於其地。作靈臺。臺少右作靈囿。囿中有沼。故有三靈之名。蓋原就南山下一片地爲之。林木繁多。鳥獸所聚也。其地在今鄠縣東。正漢志所云文王作鄠。有鄠杜竹林。南山檀栢。號稱陸海。爲九州膏腴者。文王當日弛以與民。恣其芻獵。但有物以蕃界之。遂名之曰囿耳。漢武帝欲除以爲上林苑。屬之南山。卽其地。然武帝恣意從禽。與文之公民者。不可同日語也。

交隣國有道乎

事大恤小。宣王兩不能盡。故但覺隣國之難處。交鄰一問。意直望小。畏大。懷息爭求。寧豈其本願所在。

勾踐事吳

參吳沼吳。雖當日實事。然陰謀詐術。非孟子所取。只言其能事大。合於知者所爲耳。他日吳雖爲所滅。顧其事之之時。但知越小吳大。不事必亡。如此方與畏天保國一路。

雪宮

古本晏子春秋有寧侯見晏子於雪宮事。因思引晏子對景公一段。正眼前故實也。

率西水滸二句

云水不及山。去邠踰梁山。邑於岐山之下居焉。又言山不及水。周本紀遂去豳。渡漆沮。踰梁山。止于岐下。水陸並舉矣。但據程大昌雍錄。則云渭水實在梁山之下。南循渭西上。可以達岐。又與漆沮二水無涉。

三鼎

豕魚腊腊獸肉儀禮宗人舉獸尾注云士用兔

不膚撓二句

天下無膚被刺而不撓目被刺而不逃之理只是從無人敢到眼前身遂加以非意故並無膚撓目逃之事若一看點豈直鐵鑄石打

宋人

莊列二書多言宋人如資章甫而適越不知越人無所用之者宋人也若問當於國氏得其爲盜之

言遂真爲盜獲罪者。宋人也。自曝於日。顧其妻將獻君求賞者。宋之田夫也。得人遺契。歸數其齒。告其隣。吾富可待者。宋之游於道者也。豈果其地多愚人耶。大可爲握苗者作榧。

自西自東二句

東西南北。從鎬京規算。若從天下之中算。便錯。自來文於東北。多誤引用。

朝廷莫如爵四句

首句另說。朝廷重爵。至鄉黨便論齒。若輔世長民。

尤貴德。下二句併一路。末句方接得起。說成有德則齒爵俱不敵。則下宜云惡得有其二以慢其一矣。爵字中有許多等級。語意重在君邊。明朝廷當尊君也。至鄉黨句亦不是尋常論齒。要見養老乞言。天子必有父。諸侯必有兄意思。蓋爵雖貴不得臨之。方對下慢字。

### 墓魯反齊

有謂言墓不言喪爲改墓者。禮改墓總麻服。事畢而除。故不久反齊。不然豈有大賢不行三年之喪

者。然改葬。不過遷穴。未必易棺。章內木若以美。又似新喪。古無改葬事。息園師嘗駁鄭箋爲臆說。或引列女傳。孟子處齊。擁楹而嘆。孟母見之云云。爲孟子奉母在齊。母卒於齊。孟子奉喪歸葬。葬後卽反。爲反哭於卒所。又考明郝京山則云。時君有賜。槨反齊。拜君賜也。止於嬴者。衰經不入公門也。但至齊境。行禮禮畢。仍還魯。說並有理。

### 盆掌火

闕潛邱言火是官名。左傳闕伯爲周火正。周禮有



司鐘寧行火之政令。益爲臯陶子。書疏論語疏。  
張守節秦本紀注。皆云然。古者天子建德。因生賜  
姓。故堯祁姓。丹朱豸姓。父子不必同。不必以臯陶  
偃姓。柏翳嬴姓爲疑。又按舜謂柏翳曰。咨爾費。贊  
禹功。後嗣將大出。乃妻之姚姓之玉女。然則益固  
舜壻也。

丈夫之冠也。父命之。

冠禮惟賓有祝辭。醴辭字辭。父並無辭。且以下母  
另有戒辭例之。可見命之爲令。非辭也。時文輒言

命辭可述。不知所述何辭。

湯居亳

此南亳。在穀熟。湯之始都也。後所都在蒙城。爲新亳。則去葛數百里矣。

莊嶽之間

注齊街里名。莊是街。嶽是里。襄二十八年傳。得慶氏之木。百車於莊。注云。六軌之道。反陳於嶽。注云。里名。又昭十年。敗諸莊。哀六年。戰於莊。敗。注同。使之居於王所。

王所。王所居也。使居。卽周禮所謂宮中之官府次舍也。人主燕居當先正其所習。故周禮天官於宮正宮伯之職最重。其左右宿衛供給職事皆士庶子之賢而有道藝德行者充之。是以足備顧問資匡弼。養成王之德性。蓋大臣正君第一事也。宋王左右多非正人。故戴不勝特引居州居宮禁之間。冀有所匡正。時講不明此義。只說得薦之於朝。

不得罪於巨室

春秋時權在臣下。太阿倒持。故聖賢立說。多尊君。

抑臣戰國時局却大變游士一言大臣立搖猜忌  
所中其輒得禍親賢如魏信陵齊孟嘗猶不免處  
危疑之地此孟子所以嘆國無世臣及有視臣如  
犬馬之說也外注林氏云云非戰國情勢

曾子養曾皙節

時解於必曰有竟有云雖無言有者此因注於曾  
元下雖有言無字謬用爲後文作對也孝子視力  
可爲無不爲曾子體親之意酒肉必多具以待與  
將徹必請非虛請也問有餘必曰有蓋實有也至

曾元則但供親而不寬備。不請所與。更無可與也。問有餘曰。亡亦告以實也。將以復進。元意此親之膳。還須留以奉親。不得輕與他人。蓋心心念念。只以父母口體爲重。不能如其父之默體親志也。若如時解。則曾氏父子俱不免以不誠事其親。而曾元惜財吝物。并亦算不得養口體。不特害理兼害文義矣。

遷於負夏

非播遷之遷。乃懋遷之遷。史記所云就時於負夏。

是也。負夏衛地。見注疏。

### 子產聽鄭國之政

聽字最妙。身不下堂階。而民隱無不上聞。體統尊而責任重。下文總函在一字中。

### 徒杠輿梁

先儒皆以杠爲砪。杠從木。恐只是架木。梁卽造舟爲梁之梁。比舟而橫木其上。卽今浮橋。若非架木造舟。則一成永利。何用每歲每冬用力而成。

### 西子蒙不潔

古注以不潔汗巾蒙其頭也。古者婦人出必蒙面。蒙字較有着落。

外丙仲壬

史記謂丙壬繼湯而立。一二年一四年。書太甲居憂。漢志有云服外丙服是也。第與書序成湯既沒太甲元年終不合。至以二年四年爲年歲。則四歲者長當先序。世本世紀皆謂湯年百歲。丙壬年幼如此。是湯九十七九十九更生子矣。

鬱陶

注思之甚而氣不得伸。解鬱字未解陶字。趙注引  
檀弓人喜則斯陶。解陶爲喜。又於鬱字欠解。廣雅  
鬱陶喜也。憂也。兼兩義而未甚明。惟毛西河謂喜  
愛不能舒結而爲思。頗盡二字之理。

知虞公之不可諫而去

此爲一句。之秦爲一句。略一頓遞下。之往也。考史  
記乃晉虜百里奚爲媵於秦。非奚去虞。卽之秦也。

虞虢

虞在今山西平陽。虢。西虢。在今河南陝州。名雖兩



省界却相連。賈逵注。虞在晉南。虢在虞南。形勢瞭然。

今夫薏麥節

薏麥是降材之同。能同生同熟者。不陷溺者也。反是者。陷溺者也。播種下五句。雖有下四句。一反一正。並就後來言之。新安以皆熟以上。統明降材之同誤矣。

則已談笑而道之

人方盛怒。不便正辭勸解。談笑而道。所以柔其怒。

使言可入也。須善會。

儲子得之平陸

平陸去齊都六百里。爲相朝夕君側。如何責其親來。意當日國相皆得周行境內。如范雎傳所云秦相穰侯來行郡邑。車騎至湖關。湖關去咸陽亦幾六百里也。前輩並有此說。

秦穆公用之而霸

此句不是正對賢者有益於國。處處抱轉上句。方與下文一氣。

昔者王豹節

此節主腦在是故無賢句。注於魯穆公之時節云。譏孟子未必能有爲於本節云。譏孟子未足爲賢。分割了然。一路都爲無賢二字。觀逼非仍在事功上較論也。故下節亦但以不識兩字破之。不復於事功置辦。

葵邱之會諸侯

蒙引如此讀。葵邱有二。一爲齊地。近臨淄。卽管至父所戍者。一爲宋地。遠在齊西南。宰孔言齊侯

西爲此會。則宋地也。

載書

趙注束縛其牲。但加载書。不復歃血。載書二字。是實事。卽周禮司盟掌盟載之法。左傳襄九年所稱士莊子爲載書也。以載訓加者誤。

白圭

魏文侯用白圭。拔中山爲十七年事。閻伯詩推至乙酉。孟子至梁。凡七十三年。疑名丹者別一人。樂記載子夏與文侯問答。爲文侯二十五年事。年亦

當一百餘矣。

如其自視飲然

富厚雖附吾身而無補於性分之不足故但覺其飲然非處富不自滿假之謂自視二字離上句說分定故也

性之稟其全者其分同也欲動情勝利害相攻無以定之矣聖人定之以中正仁義而主靜立人極焉是分定注脚

摩頂

註摩突其頂似高起一層之狀。何以至踵。正義云。突穿突也。

臯陶爲士

古刑官曰士。但稱士。不稱士師。士師司寇之屬。周時始有。

堙澤

卽襄十七年築者。譚曰之澤門。杜注。宋國城南門也。

虎賁三千人

據周禮虎賁氏職。如今親軍禁兵。然止下大夫二人。中士十二人。府史十人。胥八十人。虎士八百人。何以武王多至兩倍。意先時只是軍卒。各目周公立制。始爲親軍護衛。更定人數也。

口之於味章

兩不謂是爲性命。嚴其辨。所謂性也。命也。乃就世俗所云言之。不是果有兩項性命。君子有意伸抑其間。

有私淑艾者

重君子使人得以私淑與予私淑諸人也不同。

人能充無受爾女之實

爾女未必就輕賤。金縢周公於祖父亦爾女之。詩書此類甚多。輕賤之意形於口道。爾女之際。爾女可受。爾女之實不可受。



四書偶談外編

太平戚學標翰芳著

無友不如己者

如猶同。所謂合志同方。營道同術也。卽如己必敬。必誠。人亦如己之必誠敬。此便可友。不然縱才力高出於我友之。亦有損無益。

孟懿子問孝章

孟僖子病不能相禮。將死命懿子兄弟從夫子學。禮無違一對。正是要其遵遺命學禮。特言簡。懿子

不再問。恐其泛認。故因遲發之。此問當在僖子死後。不然不連葬祭言。

### 禘

周公爲文王大宗。得稱宗國。立文廟爲出王廟。魯備天子禮樂。以原祭文考。然此名宗祭。不名禘。禘祭不立廟。宗祭立廟。宗祭禮減於禘。止用四代禮樂。而後此以祭所自出。遂冒宗作禘。且駕言成王賜而伯禽受。則僭甚矣。考禘祭亦合食。故商頌大禘。有元王相土諸遠祧。周頌大禘。有烈考皇考。

諸親廟韓詩外傳所云存廟毀廟皆升合食者始  
祖出祖一正一配之說起唐陸淳而趙氏襲之

### 媚輿

輿非別有神如祀竈而迎尸於輿此卽竈之神賈  
意竈行令得權卽求之於輿仍不外竈司禍福之  
柄何如竟就竈祀之直捷譬我在家用事便到朝  
廷。也是我何必遠求常說輿比君竈比臣微似以  
輿爲尊神而擁虛位者。古家不祭神禮文五祀  
皆祭於廟如祀竈則在廟門外之東以祭廟時凡

鼎鑊庖福皆在此。故就此祭之。至迎尸則在廟門外西室之奧。

射不主皮

射有主皮者。有不主皮者。不主皮者。禮射也。鄉大夫以五物詢衆庶。卽鄉射禮所云五物一和二容三主皮四和容五興舞。雖亦尚主皮而能此四者。卽不中質亦合禮力。射則期中質。卽主皮之射尚書大傳所云澤宮校餘獲者。凡田所獻備祭有餘。較射而分之。雖亦貴容節。却重主皮。至質革直是。

武射。禮射。張侯。力射。張獸皮。武射竝無此。但取甲革而貫之。周官所謂甲革。楛質。言以甲革爲樹質。國語稱三革之射。一甲革。二胄革。三盾革是也。又皮革一類而有辨。凡楛皮之法。謂以布爲侯。綴皮其中。以爲質。質者。鵠也。侯以弓定尺。三分侯之。尺以爲正。其中爲質者。爲皮。只四寸。而有熊侯。豹侯之辨。此全於毛色別之。革則去毛者。

### 遂事不諫

舊注指哀公故云事已遂不可復諫止。今貼宰我。

則無所謂事勢難已矣。遂者擅成事也。易無攸遂。公羊傳大夫無遂事皆是成其事。擅宰我不知退讓。任意而對。此處有專擅意。

其養民也二句

子產養民常有實政。所謂實政不外制田里。正經界。治溝洫。日定章服。使大家不致以僭侈。庠取百姓不致以踰分。耗財。至使民則用民之力。如營建興師類義者使之必以時。必以事。不無故而擾民也。上句惠字。自不止寬猛相濟。下句就民說。自不

必兼上下貴賤等級上句卽道千乘章愛人下句  
卽使民時

十室之邑章

若讀至者字任以焉字連下言焉不如我之好學  
語更婉轉考晉衛瓘有此讀但以末句爲必有好  
學則解太曲矣

必在汶上

欲去之齊此孔安國之說考汶水有二一出瑯琊  
東入濰全係齊地一出泰山萊蕪西南入濟有齊

境而魯地爲多。蓋齊魯以泰山爲界。今大汶口尚在泰山南百餘里。詩汶水湯湯。下接言魯道有蕩。知汶在魯境。雖至齊必由之途。其去齊尚遠。必在汶上者。以汶水東北一帶多深山大谷。踪跡難到。欲借此隱避。以全其志。未必有去齊意。時講又添出不能越境相名意。立言益近於激矣。

觚不觚

觚容二升。取寡爲義。詩傳飲常寡。少曰觚是也。今名爲觚。而其所受乃如三升之觶。四升之角。於義



全失矣。傷改制。并懲貪飲也。

### 文質

質字有兩解。一質地。一質樸。凡對文言者。皆質樸之質。非質地之質。無本末之分。蓋以質地論。如以甘白爲和。采底子。自含有本意。若對言文質。則如一味三五分甘。卽是質。六七分甘。卽是文。一物三五分白。卽是質。六七分白。卽是文。甘白亦在五味五采中。何處見本末。故禮器甘受和。白受采云云。未可以訓文質也。且忠信之人。可以學禮二句。尤

不可以文質對言。在禮明云。有以文爲貴者。有以素爲貴者。是禮中該有文質。豈得獨以禮爲文。而忠信爲質。總由認質地之質。爲質。文之質。故動引此數語爲說。而本末輕重之成見。牢不可破矣。周末文勝固然。然元公制禮。何等委曲繁重。至春秋。日趨苟簡。其弊坐文不足者。正復不少。

衛輒拒父

春秋諱內不諱外。許止趙盾。猶顯加以弑逆。豈有輒拒父而不大書爲天下後世戒者。哀三年。經書

齊國夏衛石曼姑帥師圍戚。是時蒯聵在戚而曼姑固輒所遣。乃書法轉以齊主兵而於輒無專詞。推尋其故。以晉失德而虐諸侯。因之衛靈齊景魯定三國同謀叛晉。趙鞅又遷衛貢實晉陽以絕彼往來。於是衛亦合二國援朝歌以抗鞅。是則晉衛爲仇。幾於勢不兩立。而蒯聵乃背父而奔依之。會靈死。鞅遂借納聵以潛師伐喪。蓋聵惑於納已之言。不悟鞅之意在襲衛。衛之拒固靈公之志亦宗社之計。不得不然。雖聵在軍。譬也先挾英宗入關。

明君臣力戰拒之爲拒也。先不爲拒。英宗也。拒父之名。晉必假以爲罪。而其爲拒。晉非拒父。不唯當時諒之。卽聖人亦諒之。特不能去位。自全此。則輒之。自陷於逆耳。

謂之吳孟子

昭公諱娶同姓。改稱孟子。使若宋女。并連吳字。諱之。春秋爲國諱。但書孟子卒。亦無吳字。吳孟子之稱。乃時人不肯沒其實也。坊記猶去其姓而曰吳。疏謂是當時之言。孔穎達疏左傳論語亦然。

篤信好學章

開口便說守死。自爲身際季世者立說。守死重善。道尤重善。道由篤信好學。二節是守死善道之事。末節又與天下有道二句作反對。皆重在下一句。天下有道二句只是謹於出處。與孔顏用舍行藏境地迥別。

學如不及章

失非得失之失。乃相失之失。如云失落在後也。如此方與如不及一直。

巍巍乎舜禹章

此美舜禹之受禪盛德之至天下自歸而已未嘗  
以身與其間所謂不求而獲也

三分有二節

冀充青徐揚荆豫梁雍禹貢九州夏制也冀雍豫  
幽營揚充荆徐爾雅九州商制也揚荆豫青充雍  
幽冀并職方九州周制也三分有二宜引商制爲  
說紂都在豫天子近圻無遠屬牧伯之理六州歸  
附當析出豫言書西伯戡黎解者以西伯爲武王

亦以黎近帝都。文王時不宜稱兵也。

### 黻冕

黻黻字近而不同。黻是蔽膝以韋爲之。是佩衽之屬。一名韠。一名誅鞬。不列章服之數。黻則繡之裳者爲。十二章服之一。其文兩已相背。一繡青。一繡黑。考工記云。青與黑謂之黻。是也。周官五冕之制。其口衮冕。鷩冕者。皆以衣裳采色。聯之冕首以爲名。諸冕或九章或七章五章。於山龍華蟲之屬。有去取。獨無一章。無黻。至元冕且全繡黻。不間他章。

以黻者衣裳之極事。合東青北黑良方之成始成。終以爲象。故五冕可總稱黻。冕是則黻。冕實統冠服而言也。禮天子朝覲諸侯與大祭祀大賓客皆用衮冕。降而饗射用鷩冕。又冕而親迎。冕而躬秉耒。大事無不用冕者。卽以黻作黻亦不獨祭祀用之。詩庶見素韞用之。喪禮朱芾斯皇用之。戎服士冠禮有服韎韐服爵韠之文。蓋亦禮服通用。

### 麻冕

冕以木爲幹而衣以布。後高前下有俛仰之形。緇



布冠不用木亦無俯仰服冕自大夫止緇布冠通乎庶人

拜下

禮凡錫燕君行享賚則臣或下階行謝及君辭之而後升階畢其儀此謝拜非禮拜也禮拜君不辭一定在階下

執圭

命圭非諸侯親行不用聘則用瑒圭所謂臣所執降其君一等也詳周官典瑞及玉人職

紺緞飾

禮經言齋服多係元色。荀子哀公篇元端元裳皆天子與士共之。云紺色者古無明文。說文訓紺作深青。孔安國意爲元色。皇侃謂紺深於元亦無定論。禮家三年練以緇爲飾。爾雅一入爲緇乃黃赤之色。若緞則考工記五人爲緞。注云以赤染黑是孔注云淺絳色。皇侃已指其誤。大抵古重陽色。紅紫雖間色。陽色尚存。紺緞一類。丹秣赤汁盡爲黑。涅故并飾不用耳。不必依孔氏喪祭分貼至飾字。

本兼領袖言之

袷綈綌

孔安國曰暑則單服綈綌必表而出之加上衣也。周禮六服有展衣卽表衣詩蒙彼綈綌用展衣出其上以見君及賓客也。綈綌在禮名素紗而展衣以丹縠爲之素紗外罩以丹縠正與單綈綌加表衣相正明

不時不食

舊注以朝日中爲三時然禮經多非時食知春酸

秋辛。春葱秋芥。又如春食齊。秋醬齊。春羔膳。薤秋  
麋膳。腥類可推廣言之。

割不正不食

正義謂禮割有正數。必折解牲體。使春脅臂臠之  
屬不得混雜。此與周禮掌割烹之事。必先辨體名。  
少牢禮解羊豕。必分前體後體。自肩臂臠膊髀。及  
三脊三脅。凡十一體。所謂諸子正六牲之體者。不  
特大祭祀有之。庶割字正字。皆有經據。又縱橫細  
割。謂之午割。割不必定方也。

式負版者

鄭司農注宮伯職云。版名籍也。今時鄉戶籍謂之戶版。康成內宰注云。版謂宮中閤寺之屬。及其子弟錄籍也。圖王及后世子之宮中。吏官府之形象也。似戶版仕版亦可兼言。

三嗅

梁顧野王玉篇有嗅字。五教反。呌也。以嗅爲呌。直提之至。

浴乎沂

浴韓昌黎作沿謂循沂而遊周之三月卽今正月  
尚當寒時安有浴之理哉

民信之矣

民信是一政故下文稱三者如謂有兵食然後可  
致民信是兵食反急於民信矣

徹

孟子言助者藉也春秋宣十五年傳穀出不過藉  
杜注借民力以耕公田穀祿所出不踰此數公羊  
穀梁亦云什一而藉然則周制雖徹仍是助法蓋

使通力計畝則內外公私俱可不立於孟子非力  
百畝節難通而合作則無夫之上下均收則無食  
之多寡按之上農夫食九人節亦礙可知徹助一  
法其別名徹者徹通也以通貢助爲言也

### 子路無宿諾

按左傳小邾要子路盟子路辭自全文觀之是子  
路不苟諾故無宿諾集解作不豫諾謂不先諾也  
正所云然諾不苟者

### 樊遲請學稼章

四書存言 三  
漢儒謂遲思以學稼教民。謝上蔡亦云。遲學稼將以爲民。非役志於殖貨者。第其說已有啓後來神農並耕。西秦令墾之弊。故夫子抑而教以大者。四方之至。非大夫以下事也。

愛之能勿勞章

次句以師道言。父師一例。孟子曰。教人以善。謂之忠。卽此處忠字註腳。

市朝

先輩言。朝非殺人之地。禮遇諸市朝。不反兵而闔。



兵器亦非入朝之物。史記孟嘗君傳日暮之後過市朝者掉臂不顧。索隱言市行列有如朝位。凡有官處皆得稱朝。如所稱郡朝縣朝。不定至前朝後市也。左傳太子光尸戎子於朝。楚王殺令尹子南於朝。自是亂法。

### 行夏之時

沈括言以斗柄初昏建寅之月爲歲首。此古歷。今正月斗柄指丑。蓋歲差也。但以冬爲亥子丑。春爲寅卯辰。不必因所建也。春秋時惟晉行夏正。

君子學以致其道

古之教者。家有塾。黨有庠。術有序。國有學。而學其  
總名。游息有所。所習有業。考校有法。亦如工之有  
肆。然非是則道不成。

數仞

論語注七尺曰仞。此出包注。孟子九仞沂。八尺曰  
仞。此本趙岐說。文仞者。伸臂一尋八尺。顏師古漢  
書注亦以伸臂一尋爲言。蓋尋本八尺。以意度兩  
臂立義。而詩仞義同。周禮匠人作澮。廣與深俱

兩其八尺。謂之廣二尋。深二仞。以尋仞俱八尺也。  
喪致乎哀而止。  
孔安國曰。喪恐滅性。故致哀而止。毋過情也。如此  
語意自無弊。

### 道不遠人章

時講以此下三章皆費之小者。子臣弟友。聖人所  
未盡。得謂小乎。下大孝幾章。皆由庸行之常推之。  
以至其極。卽此章固已該得先輩云。此等處不必  
瑣瑣分貼也。

上祀先公

先公。祖紺以上至后稷。此襲鄭注。后稷雖不言追王。然七世祖也。王者立廟以事七世。而主廟者爲先公。將稱先王廟乎。抑先公廟乎。考后稷原稱先王。國語稱契爲元王。武城稱后稷爲我先王建邦啓土是也。故周頌先王先公。注先公自祖紺以上至不窋。不列后稷。周禮司服享先王服衮冕。享先公服鷩冕。舊注先公自不窋以下。亦不及后稷。是稷不惟改稱。且改服矣。不然先公鷩冕。則天子

將改禕服以臨祭。幾見天子禕服入廟之禮。

來百工則財用足

來百工。是冬官庀飭一大經。其所云財。卽天官九職以百工飭化八材之材。所云用。卽考工辨器用之用。工不一。財用亦不一。如木工攻木財。則得木。用金工攻金財。則得金用。卽以金工言。鳧與桃段。其工也。金錫諸齊。其財也。削鐻鐘量。其用也。

朝聘以時

王制比年小聘。三年大聘。是侯國之相聘禮。五年

一朝。是夏殷朝制。尚書周官。六年五服一朝。又六年王乃時巡。諸侯各朝於方岳。大略周禮十二年。中王一巡狩。諸侯兩朝。凡巡狩之明年。侯服一七年。甸服二八年。男服三九年。采服四十年。朝。衛服五十一年。朝。要服六十二年。朝。中六服各一朝。尚書言五服者。以要與荒。鎮蕃四服在五服外也。於是天子巡狩。諸侯又朝方岳下。此常朝也。又有不期而會。如王國有大事。諸侯齊至曰時見。如十二年不巡狩。則諸侯共朝京師曰殷同。

此間朝也。然且五服殊方。各以時至。東方以春至。曰朝。南方以夏至。曰宗。西方以秋至。曰覲。北方以冬至。曰遇。其見於諸禮不同如此。若聘則天子於十二年中。每間歲。下問於諸侯。以一三五七九。十一年爲度。謂之六問。而六服則皆以朝應之。次年遣卿入聘。繼此則間年又聘。共六聘。凡十二年中。侯服以一七。年朝。則有二四六八十。十二年六聘。甸服以二八。年朝。則有三五七九十一。一年六聘。皆除巡狩年外。以次而周。所謂陽年朝。則陰年聘。

陰年朝則陽年聘。朝聘不重複。此大聘也。然且天子有歸賑致禴賀慶諸小聘。而諸侯於天子則遇王國有事。卽遣大夫不時入聘。謂之時聘。亦曰小聘。若左傳鄭子太叔晉叔向所云歲聘間朝諸說。皆霸國所定之制。正義以強合周禮殊令朝聘大典一徑訛錯。

厚往而薄來

周制十二年中天子一適諸侯。諸侯兩朝天子。天子六問諸侯。諸侯六聘天子。卽往來也。往禮有徧



存徧類致福贊喜補災致禱如天王賜胙宰嚭歸  
賄周定王告晉之慶類卽是厚往若來則諸侯朝  
時有侯服犧牲甸服綵帛男服麤器采服纁纁衛  
服龜貝類在九貢之外聘有琮璧幣帛庭實皮馬  
在春秋入貢獻功外皆來禮也至燕賜如宰大掌  
客牢禮膳獻賓賜餐牽類是燕勞非往禮

不日成之

國語引此詩韋昭注云不程限以時日

易耨

趙注芸苗令簡易也。朱虛侯言立苗欲疏呂氏春秋其耨六寸所以間稼皆同此義。又與深字對說似長。

釁鐘

古凡造宮室器皿必血祭以饗其成謂之釁禮。故禮云釁者所以交於神明之道也。周官大祝隋釁或作塗血或作薦血總是血祭。後來始有血塗釁隙之說雜記成廟則釁之豈有以血塗廟屋者。天府釁寶鎮月令釁龜筮皆無所謂隙也。周禮羊人

禴。禴。供。羊。牲。鷄。人。禴。禴。供。鷄。牲。禮。記。宗。廟。之。器。費。  
之。以。豶。豕。並。不。用。牛。其。用。太。牢。後。人。變。禮。加。後。耳。  
是。以。君。子。遠。庖。厨。也。

遠。庖。厨。者。不。使。親。見。親。聞。之。死。食。肉。固。無。害。於。仁。  
也。正。以。巾。明。未。見。羊。則。其。理。未。形。而。無。所。妨。意。至。  
於。預。養。是。心。而。廣。爲。仁。之。術。乃。朱。子。恐。人。因。此。啓。  
傷。殘。物。命。之。弊。云。然。非。本。文。前。後。正。旨。講。家。轉。以。  
此。意。作。主。愈。說。愈。不。明。矣。

集是着力字。猶集義之集。言從九分中。并兼侵滅。零星湊合。得有一分。若作虛字。云集而計之。便不成文理。

蹙頞

說文。頞。鼻莖也。人憂戚則蹙鼻莖於眉宇之間。卽攢眉也。吳諸葛恪折頞廣頞。謂鼻根曲而頞宇寬。正頞頞之辨。

齊人伐燕

兩章當是兩時事。梁惠篇則孟子初至齊時。宣王

事也。史世家燕文公卒，子易王立。宣王因喪伐之，取十城。既聽蘧秦說，歸燕十城，且重立燕王。則以諸侯謀燕故也。若公孫篇爲孟子再至齊時潛王事也。史世家噲屬國子之，國大亂，潛王令章子將五都之兵伐燕，噲死，子之亡。三年而燕立太子平。畔齊後二十八年破齊，潛王走死，齊人立襄王。則孟子去齊久矣。七篇中單稱齊王者，多係潛王以孟子作書時潛王未死尚無諡也。

### 築薛

此田嬰之薛。非奚仲之薛。六國表齊世家並云。湣王三年。封田嬰於薛。國策靖郭君將城薛。以客海大魚之諫而止。當時雖無偏滕意。然虎牢城而鄭懼。東陽城而萊服。密邇隣境。安得不恐。據此。任姓之薛。亡在滕先矣。而宋將行政章註云。宋王偃嘗滅滕。伐薛。則是滕亡。薛存。考滕爲宋滅。止見國策。占雀籍。漢志杜氏釋例。水經註並云。齊滅之。竹書又云。越滅。

微仲

微爲圻內國。微子啓所封。微仲則其次子。古今人表一註紂兄。一註啓子。包爾庚時文亦云。微仲者。微子之次子也。無國邑而稱微。從父封也。厥後封宋而終身稱微。仲忠孝之義也。

### 置郵

駟卽驛也。字書馬傳曰置。步傳曰郵。又馬遽曰驛。步遽曰郵。是驛通於置。而郵不然。後漢改郵爲置。謂改步遽爲馬遽也。雖置郵皆宿舍之名。而置長而郵短。以步不遽馬也。漢烏孫傳有便宜因騎置。

以聞則馬專屬置黃霸傳郵亭鄉館謂停行之館則步專屬郵此顯然者若驛之同駟則一字而兩行者左傳楚子乘駟子木使驛隨其所書其郵之通駟誤實始於廣韻

淫詞知其所陷

淫訓放蕩是只管流出去與陷之深入內者不合作浸淫解始與沉溺一串

屨無夫里之布

布泉也夫布里布各另一項問師凡無職者出夫



布是游惰之罰。載師宅不毛者有里布。是世家佔業爲臺沼之罰。當依周禮。廛自有總布。紵布之征。按此節再主市宅說。與第二節複。若以許行受廛例之。作新附之民。而以廛爲夫。一廛之廛。下氓字較有着落。

王之爲都者

都者縣邑之總名。禮十邑曰都。周官四縣曰都。毛詩傳下邑曰都。又小曰邑。大曰都。所謂邑有先君之廟曰都。乃引春秋傳爲解。宗卿建宗。得設先君

一廟於宗邑。名曰君廟。

### 周公使管叔監殷

王制記商制。天子使其大夫爲三監。監於方伯之國。國三人。原以三王官出監侯國。周制則先以王朝二伯。九州牧伯爲監官之長。然後設連帥。卒正。屬長等官。分監諸侯之國。而自相統攝。周禮所謂建其牧。立其監者。不特連帥一人。稱三監。卽卒正。屬長。亦稱三監。猶之太師。一公。稱三公。太保。一輔。稱四輔也。書序云。三監叛。祇管叔一人。卽以管叔。

爲三監也。孔氏誤認三字以管蔡與商當之。商卽武庚。豈有武庚監武庚者。卽蔡叔並不監殷。左傳周公痛二叔之不咸。及管蔡啟商。基間王室。不過流言啟釁。故管誅而蔡囚。其罪亦輕於爲監者。若霍叔則并孔註不及。後鄭氏作詩譜。据蔡仲之命。謂霍亦流言。遂以霍代商補三監之數。監殷自是連帥之職。若謂以身監守武庚之國。則管叔本封委之何人。又如專爲武庚而設。此後世制防之術。豈所語於聖人。

請野節

鄭氏云鄉遂用貢都鄙用助遂地在郊外不得統鄉遂屬之國中周官於六鄉明言九夫爲井安見田不井授盡用貢法遂人之文明言治野夫間有遂十夫有溝安見野不可什夫而必行助此孟子就滕酌筭耳古註而如也便見是大畧依古不是盡改今制

九河

大河

并在此九河中卽徒駭也春秋時齊

植塞八河。不及徒駭。漢成帝時。河隍都尉謂徒駭  
在北。是大河故道。春秋緯亦云。齊移河爲界。而填  
闕八流。以自廣。故八名盡湮。而徒駭獨在。以其爲  
河身也。不得如蔡氏注。禹貢別出大河。

### 脅肩

趙注云。竦體。漢書吳王濞傳。脅肩累足。鄒陽傳。脅  
肩低首。師古注。脅。翕也。謂歛之也。楊雄傳。作翕肩。  
蓋歛兩肩爲卑縮之狀。於小人情態尤肖。

### 裸將於京

助祭京師。不曉何祭。周制六年一朝。猶且疏遠難齊。豈有大饗大祫。可頻年一至京者。况卜祭有月。日。必欲使六服諸侯同日集廟。亦必無之。事故宗廟序爵。從來禮文皆拈同姓內諸侯言。鄭注所謂公卿大夫者。至後來始當以異姓。大抵六服助祭。惟開國一至。武成所云丁未祀周廟。邦甸侯衛駿奔。走執豆蓬是也。外此則王國建都如武王營洛。康誥有侯甸男邦采衛和。見士於周之文。洛誥有王在邑。然祭歲王賓殺禋咸格之文。又新君卽位。

當亦一至如舜卽位則書云祖考來格虞賓在位  
羣后德讓太甲卽位則伊尹云祠於先王侯甸羣  
后咸在是諸侯助祭惟此開國建都卽位三大禮  
餘因來朝適會祭時理或有之於禮經無考也

### 千歲之日至

日至有两至。不止冬至。至是中氣在望。後不在朔。  
凡朔日遇至。必前是閏月。以節氣移之望。後而後  
移中氣在朔。如僖五年正月辛亥朔日南至。正義  
謂去年十二月是閏也。未聞造歷先置閏者。日至

二字當如禮日短至日長至春秋傳日南至日北  
至孟獻子言正月日至七月日至兼冬夏言之造  
歷先定兩至而後兩分四時二十四氣十二月三  
百六十日以次而定傳所云履端於始謂求之於  
日月五星運會之始也舉正於中者卽正中氣定  
日至也正猶書正仲夏正仲冬也然後以餘分置  
閏歸餘於終焉據堯命羲和諸官考時置閏其分  
命申命只以冬至屬朔易未嘗屬歲首且以日出  
驗朔旦中候未嘗較夜半也歷有三正而造歷者



必據寅建。以或子或丑。則四時不正。今甲子夜半。冬至。則子正也。其說本之新唐書五代史。非古法。

### 校人

主池沼小吏。此古注。不見所本。或意只是養馬。胥役偶在左右者。校人牧養見周禮。

### 有庠

道州鼻亭之說。後人多不之疑。考其地在今廣西永州。安有兄都蒲坂弟居零陵。陸阻太行。水絕洞庭。較驢。堯放處。猶遠千里。而能源源而來。時相接。

見之理。地志云。相傳舜葬九疑。象常來此。後人爲立祠。此則理可信者。若所封國。必去帝都。不遠。惜莫得而考。

### 五羊之皮食牛

言衣此五羊之皮。食牛。連五羊皮爲裘。蓋賤者之服。而奚素所衣者。不定所得之值也。風俗通奚爲秦相。其妻歌曰。百里奚初娶我時。五羊皮可知。奚服此已久。史記夷亡秦走宛。秦以五羖皮贖之。特持其平日所衣爲驗。明將用之耳。曾謂五羊皮。

之賤。奚一身得值。止此而秦且以向大國。賸通逃之臣哉。大意本朱竹垞。

曾子居武城有越寇

講義有浮海入寇之說。此認越在會稽也。考勾踐滅吳。嘗徙治瑯邪。築臺館。而武城在今費縣西南八十里。爲魯邊邑。與越正相隣。豈煩舟師從海入淮哉。又魯有兩武城。此爲南武城。曾子卽其邑人。卒之東郭一段。

宋元刊本。卒之東郭。墦間句之祭者。乞其餘句。不

足句。又顧而之他句。三之字與上兩所之之字緊。  
應乃朱子舊讀。今本明大全改。古不墓祭。見魏  
文帝詔。及蔡邕語。然周禮豕人。凡祭墓爲尸。周本  
紀。武王上祭於畢。韓詩外傳。椎牛而祭墓。則古固  
有之矣。其云不墓祭。謂不當以應祭於廟者移之  
墓也。

磯

說文。大石激水也。廣韻。正韻亦並云。石激水曰磯。  
獨註則爲水激石。竊謂石呆物。水動物。水濯石而

石不爰。非以石擊水而水致怒也。然則當以水喻母以石喻子。

### 附庸

王制註小城曰附庸。庸古墉字。猶後世言屬城也。王莽曰附城。今多作功字解。未見所据。

### 費惠公

明云小國之君。加之百乘之家上。則非邑君。若齊棠公。楚申公類。蓋邑宰雖僭公稱。仍是大夫下一屬長耳。費邑三家所屬。豈得駕孟獻子之上。左傳

殄滅我費滑。註滑國都於費。當子思時已亡。曾子書有費君費子之稱。呂覽慎勢篇有云。以滕費則勞。以鄒魯則逸。或別春秋時一小國。或卽季氏後僭据爲附庸者。

委吏乘田

註委吏主委積之吏。乘田主苑囿芻牧之吏。据世家孔子嘗爲季氏史。料量平。註季氏委氏之誤。史者吏之誤。卽委吏也。周禮地官有委人。掌歛甸稍芻薪之賦。凡甸稍中材木薪草及瓜壺葵芋諸物。

悉收而賦以供祭祀賓客軍旅薪蒸炊燎蓄糲之  
用其事極委瑣故曰委吏委者曲也必合甸聚稍  
聚積筭故須料量卽會稽也若委積別一官但主  
給養自鄉里門閭以及道路之委積遇應給則給  
之其官名遺人所謂遺人掌邦之委積者與委人  
歛野似不相涉世家孔子嘗爲司職吏而畜蕃息  
周禮牛人有職人主芻豢者職通作櫟杙也所以  
繫牛之物凡牧人掌六牲牛人掌養國牛必授職  
人芻豢之其又名乘田則以公牛芻豢皆甸田中

事也。若苑囿芻牧。則園人所掌。只游觀鳥獸之事。未必有牛羊。

### 擊柝

集註行夜所擊木也。本趙註。行夜卽今巡夜。後來多訛爲夜行。

### 槭棘

槭棘小棗可食。所以養之。於養口腹意有關照。

### 曹交

春秋哀八年宋已滅曹。戰國時更無曹國。趙氏隨



手爲註。將弟字改後字。則妥矣。鄒本春秋邾國。  
系出曹姓。顓頊之後。見孟子題辭。交欲見鄒君意。  
同出也。

### 放飯

古人飯皆以手。鄭註禮記。去手餘飯於器中。人所  
穢。方靈臯曰。餘粒散布也。